

und anselicher ist gewest, den des kenniges, auch mit guter profant vorsehen, da sie gessen und getruncken und gespilt haben. Er hat k. m. funff schyff mit leuten als sein k. m. rete und oberste herren von Bemmen, etliche botschafften als bebische und Venedigische, auch sein may. trommeter daruff gehat, die wol beladen seint gewest. Also seint ir k. m. und furstlich gnaden zum Kennigsteyn im flecken umb 11 oren nach mittage ankommen, da den m. g. h. koche vil guter essen von grossen fohren und andern fischen und ander essen zu gericht, die man also angericht uff die schyff getragen und im rap faren die malzeit auff dem schieff gehalten, das den gewehrt hat bis under den Liligensteyn.

Ahn dem Liligensteyn hat m. g. h. ein hirschjaget bestellt, die umb IIII nach mittage gejaget ist worden, und die hirsche und das wilt ihn die Elbe zcum schieffen geyaget, seint erstlich funff hirsche durch geloffen, darunder zewene hoch und wol auffgesetzt; dieweil die Elbe fast klein gewest, seint die hirsche und wilt schwinde durch geloffen, darzu hat k. m. mit der bochssen geschossen, aber dieweil die hirsche weit und sehr geloffen, hat er gefelt.

Es ist auch ein hirsch ein mal ader vire ins wasser geloffen und hat sich wol beschussen lassen, sunderlich (von) den konick mit bochssen und armbrusten, aber doch sein haut gantz darvon bracht, wiewol der kennick bis zu halben knyhen ins wasser geloffen. Darnach seint aber VII stuck mit ein hirsche her durch gelauffen und seint bey XXIII stuck dar durch gelauffen, aber nuhr funffe behalten, dieweil es den Spanyern seltzsam zu synn gewest, haben sie treulich gewert mit lauffen und schreien, das dester weniger rein geloffen ist, und ist die jaget nicht vil mehr aber kaum ein stunde gewert, den es sich nicht lenger hat leiden wollen, dieweil es sich czum abent geneiget, und das man das nachtlager, das zu Pirren gehalten, bey tag hat erlangen megen. Und als man aufgeblasen, ist noch vil wilppret, hirsche und auch rehe in tuchern gewest und die hunt nachgeloffen und wol gejaget, darin der kennick ein gross gefallen gehat und seint also gen Pirre ihn die stat gezcogen und in der stadt gelegen.

Unnd im einzuch, als die herren ausz dem schyff kammern und zu ros eingezcogen, sint vil harter schösse vom schloss und in der stadt gescheen, dieweil es in den